

四庫全書

集部

欽定四庫全書

集部
庸齋集卷二

詳校官起居注主事臣顧宗泰

主事臣呂雲棟覆勘

謄錄監生臣孫永治

欽定四庫全書

集部四

提要

庸齋集六卷

別集類三宋

臣等謹案庸齋集六卷宋趙汝騰撰汝騰字茂實庸齋其自號也太宗七世孫居于福州登寶慶二年進士歷官端明殿學士提舉佑神觀兼翰林學士承旨事蹟具宋史本傳其集宋史藝文志及諸家書目皆不著錄厲鶚

宋詩紀事載宋宗室共七十五人亦無汝騰之名惟永樂大典各韵中間收入汝騰之文有題趙庸齋集者有題趙庸齋蓬萊閣紫霞州集者又有題庸齋瑣闥集者而舊序已佚其卷目次第不可復考謹蒐羅殘缺釐次成編析為六卷篇帙無多可無煩名目統題作庸齋集以歸于一汝騰生朱子之鄉故沿湖餘波頗能講學然史稱其守正不撓其為禮

部尚書兼給事中時上疏極論姦諛興利之
臣戕損國脉而規切理宗之私惠羣小令集
中壬子六月內引對第一第二劄即其全文
反覆詳明深中時弊又集中內外制序自稱
嘗以草制忤史嵩之去國又稱時有無罪被
謫如王三俊李伯玉之類皆留黃不書上疏
申救施行遂為之格是其氣節嶽嶽真不愧
朱子之徒非假借門牆者可比惟考周密癸

辛禔識稱汝騰為從官力薦三衢徐霖為著作郎至比之范文正公而霖舉止顛怪妄自尊大霖之無忌憚皆汝騰縱其狂至目汝騰為大宗師已為小宗師遞相汲引霖既被逐汝騰亦不自安遂求補外云云按集中與徐徑坡唱和最多徑坡即霖之字其贈詹生謁徑坡詩云瞻彼徑坡今之泗水又贊徑坡使君柯山講席之盛詩云立天地心鳴道鐸開

生靈眼識師儒其推挹之詞殊為誕謾無狀
知周密所紀為不誣是則宋季士大夫崇尚
道學矯激沽名之流弊亦不容為汝騰諱矣
觀于是集良足為千古炯鑒也乾隆四十六
年九月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

庸齋集卷一

宋 趙汝騰 撰

頌

癸丑仲秋建安郡學丁奠退而作頌并勉同志

之士頌曰

建水懷襄孔殿歸然文未墜地道昭于天輪奐鼎新丁
奠揭虔肅肅冠佩粲粲豆籩惟聖立範載籍具傳渾渾
噩噩書教百篇危微精一綱領所先詩六義教風雅頌

全曰思無邪蔽以一言易教精微四德首元演六十四
母坤父乾春秋事教惟義與權行夏之時獨許顏淵樂
教導和鐘鼓管絃雷出地豫樂之大原禮教導中三百
三千其端辭遜如始達泉垂茲六教何千萬年睠惟此
邦儒哲比肩厥有考亭是紹濶濶發揮六學有功聖賢
守吏初獻與士周旋祀畢作頌同志勉旃

乙卯仲春丁奠畢作素王頌一首呈承祭之士

頌曰

於穆素王天縱將聖小用于魯振挈綱領萊兵面卻齊
人退聽三都隳姦兩觀鋤佞市無飾賈朝無亂政少壯
悉遜道塗不競曲阜大治諸侯交倣女樂間之可以出
遊俟牖不至于衛之境留不煖席去復俄頃幾圍于匡
幸釋以甯歸主蘧瑗耻居次乘彷徨過宋沅離在鄭魍
惡習禮木不留影立郭東門纍然誰省在陳徘徊弗授
寸柄河水洋洋不渡者命蒲盟止兵蔡懼設筭楚尼書
社彼哉讒勝轍環靡歸不容何病十有四年魯復來聘

亦莫果用六經是訂易繫禮編詩刪書定私淑三千弦
歌雩詠維持太極與天地並賢於堯舜功用之盛專饗
南面此感應蘊豆牲牢庭燎輝映萬有千載垂于祀
令承祭儒紳孰敢不敬何以事之存心養性

四言詩

贈張彊赴曲江教

聖人立教以中為常不得中行取獯取狂未見狂者吾
里有張議論傑然名壓上庠惡彼佞臣請劍尚方便終

天尋蠶績蟹筐天鑒其忠策名顏行筮仕分教九齡之
鄉惟九齡公非血氣剛憂深慮遠性端行良祿山尚微
測其陸梁國忠林甫惡未披猖公預窺之知其亂唐仁
必有勇令名無疆彼元忠輩初志激昂一遇擯抑盡斂
鋒鋠婢嬰喑啞不敢否臧自謂得計爵祿之場喪已丘
山得不毫芒士辨薰蕕與道存亡何以臻茲惟學問將
弱翁懋哉以保令芳

贈衡陽簿林士愷

吾黨仲容行脩能通而志卓然以慕直躬嘗儕扣閤力
摧姦鋒上旌其言擢第南宮府庠諸生坐斥忽忽君盡
遠詒盡援掖逢予䟽已先所見略同每起敬愛有烈士
風予歸里閑時訪藿蓬匪義不談惟理是窮告予戍及
棲枳湘中壯哉茲行近紫蓋峰刑使傑然蜀彥之雄埋
輪大勇折檻精忠朝夕趨承必得所從一被容接終身
登龍惟仕首輔必廩必公惟學策要必敬必恭胡張之
鄉名理之宗公餘取友以相磨礪

贈林耕叟赴湖帥幕

東萊之師是為拙齋學無不究道無不該體統純正規模
拓恢卓成一家猶斗之魁未及百年遺響冷灰我守寶

鑒四學是開

理學程正公史學司馬文正公文
學歐陽文忠公經濟學范文正公

以導生

徒俾紹東萊回首七霜諒多成材英英耕叟我友自
孩吐詞不羣制行亦瑰勉以朱學持論不回僕家源
流是擁是培仲尼得伋垂教方來拙齋有孫其道未頽
且告瓜熟定王之臺僮馬載馳羔鴈屢催予聞湘流夙

稱聖涯懋陵之邦元公所胎南軒昭昭五峯巍巍豈無秀
民可與摩揩求仁得仁懋哉懋哉

贈成師掾公策

易中之策陰陽錯綜是興神物以前民用受命如響吉
凶生動予取策名僕沿理控先覺仲尼方人子貢惟誠
前知不億而中中庸即易是道公共非策之策斯語請
誦

贈陳如晦

堂堂六湖清秋玉壺我則尚友豈敢為徒仁義弘毅不
可奪志豈私我朋義之與比德必有鄰二彭其人與語
終日澹無一塵以罪來歸得此四賓甘心澗谷以老我
身

贈詹生謂徐徑坂

賢哉二生不遠千里瞻彼徑坂今之泗水予詩為容有
進無止非殷洪喬乃互鄉子

次徐徑坂四言韻

歌枕肱曲匱藏美玉造道高深庭草交綠
中庸致曲學記琢玉子過仙柯瞻彼淇綠

美李頤老易

易之廣大無方無體河圖授羲斯文天啟爰畫以象是
陳八物演六十四闔闢伸屈文繫繇辭二千文旨孔絕
韋編十翼脩矣後來漁洛發明幾盡萬世學者於此
取信弘毅李君以身體易消長驗氣吉凶考德方初學時
四載忘寐感蒼筤竹至產于地蓋三十年然後成書其語

不費其趣有餘予得其藁日置書案熟視厥履為之三嘆道無隱顯形上繇下脩辭立誠窮神知化

示林宗辰勸學數語

青出於藍冰寒於水立言勸學荀卿氏子卿不如軻醇乎醇矣謂學無他求其放心存則聖賢舍則犢禽差只毫髮隔踰丈尋必有事焉所言何事而勿正心正亦何累勿忘勿助持敬之意於此習察是之謂學於此而勸其進罔覺勉哉宗辰說博守約

示趙與櫛弘毅章

天之蒼蒼而在山中大畜之象驗之于躬六尺之微萬
善畢叢徃行前言浩浩無窮一以貫之何所不容兩間
非大此之謂弘牝馬之貞行地无疆古徃今來其道有
常是以資生至哉化光君子體之六二直方直内方外
何用不臧守此之毅賁育非剛泗亭之參以此任道繇
軻而後孰其深造濂洛儒先知德之與非苟知之亦免
允蹈興夫請書朝夕戴抱懋哉懋哉至於華皓

錢趙文思崇錢歸上饒

英英吾宗神駿之姿筆有天巧自鑄偉詞抱負不凡植
立甚奇爰初筮仕即不詭隨笑世滔滔相與磷緇過予
告別凜然自期耻逐京塵願易叢祠萊衣奉親樂道忘
飢予惟上饒淵源未衰玉山文獻考亭所推章澗二泉
名論清規邇來後生古為似之徐直諒之弟直方也仁親友兄徑
坂是師予歸取友伯塤仲麓咫尺柯山考德訂疑他日
成就麟祥鳳儀

寄徐端友立大壽其母夫人

英英二徐名德之雖早從爛柯知所步趨南陔子職夙
夜盡劬九日黃花采采盈裾請壽堂萱大年方壺龐
眉髮鶴重錦軒魚母詔子前問學勉諸參匪直養心傳
泗洙誠身悅親授伋著書子曰懋哉益厲厥初榮多遺
母文繡不如戲舞樽前母為笑娛我寄四言俾陳座隅

五言古詩

酬盧威仲九日遣青衣送酒

前年重九日黃衣携御槩抗牘回天聰批鱗蒙帝念雖
慚獻六箴猶許疏十漸去年重九日石鼓償願欠菊叢對
佳客莫觴傾舊釀一時嘯詠狂萬丈詞華艷今年重九
日龜息靜中驗亭前寒葉落樓外晴波斂故人何殷勤
清樽持澹灑思君甲辰䟽擬昔尚方劍士鋒皆辟易忠
舌為飮饜回首今七秋日月光同挾知暫陸渾游難久
承明厭老我思荷鋤一壑柴桑占

暇日領客登眺

暇日登層城目眺黃花岡來山何岌業餘勢猶迴翔郡
治枕其中溪流繞其旁建中寶經始淳祐罹懷襄河伯
何不仁平陸如江洋水餘予領牧初至覺荒涼賴天賜
連稔田里多稻粱舊觀喜漸復新屋興未央偶領賓戚
游松下傾盃觴嵐氣接洲渚舉目皆寒蒼

為饒計使題

煌煌使者軒新扁煥羣目周爰遠有華不可居無竹天
風泠然來雲氣涵而簇知君子猷趣一笑等榮辱每云

安樂窩似勝相州。盡憑欄對此君。竟日翫不足。余亦慕嫖。
節時時賦。猗綠間思載。醪丟悠悠想九曲。新詩帶仙姿霞。
餐謝梁肉。願言植梅友。疎影橫水渚。

徐朝奉誥命下走介賫納徑坂賦成

驛足行都來手賫。誥一軸發視喜非常。耆儒見褒錄斯。
人德無瑕有子道。振玉陛下自好老微臣。耻干祿耕雲。
入山深釣月翫水綠。一朝朱紱賜龐眉。釋袍鵲菜衣拜。
稱慶起舞偏親族。我在霞洲上折屐。亦越宿茲忻贊書。

至哦詩遣騶僕遙知參侍點論學紹淇澳

和徐徑坂

我敬楸埜翁治郡如元結一朝殉國死黃壤恨誰雪赤
輸陳蕃心碧化萇弘血銘筆得柯仙羣陰消蟋蟀

予歸假闔廬守曰於我館風雨已遁逃雲山况奇觀徑
坂形聲詩蓬萊名遂遠求仁居之安是宅靡有間

食梅

兒時摘青梅葉底尋彈丸所恨襟袖窄不憚頰舌穿我

年不自覺以我齒尚完嘗新試一薦喉棘眉先攢豈味
不悅口豈老難強餐人生煎百憂筭梅未為酸

壽史刑使

岷峨儲英賢一例皆家食公亦淹海角麾節猶赫奕七
閩政多幸福星照南極輕裘鎮鈴閣使斧光衛戟門弧
初度臨和氣徧阡陌宿雨洗瘴氛翔雲報寒色前期為
重九後期為至日中間產蜀珍天意扶陽脉願言愛剛
健他日壽王國

七言古詩

謝胡繡使招飲

疇昔與公同奉常余為藉田公社令是時朔祭拜卿少
余已顏衰公秀瑩齋房並公揮麈尾議論風生真纚纚
蜀珍數人皆在坐盡說功名須遜子回頭一夢十五春
公為使者余塵民薰風荷畔綠樽設丹荔粲粲蓮房新
語間切切憂民瘼陰功亟欲蘇全閩出經入傳知言要
湘西絕學今誰紹我老西河欠鞭策此事須公正英妙

送眉山孫夢得從饒伯輿李純父學

景山書來說蜀珍與吾氣象清而真束書亟歸侍溫清力
祈樸學為是正程文不過工進取何若杜門誦論語一言
可以行終身世間至樂惟求仁弋陽餘干相望爾紫陽
的傳伯輿是同志更有李純父勁節清名照今古為我
問訊出此詩子親炙之有餘師

示林桂高歌

丈夫流芳在身後眼前一食常不飽何況吟工挾元化

萬象日月遭搜攪君不見飯顆山頭餓少陵柴桑徑裏
饑淵明無錢對菊坐終日得錢沽酒醉交朋又不見春
岸飛楊花聖俞得句貧轉加羊腸遶車聲黃九一生
坐窮鳴歐蘓只得從旁嘆不爾何由負盛名

景南將赴武昌道出剡溪戲成贈行

丈夫未遇時流俗多白眼張耳能致千里客相如竟輟
萬金產方子一世英要路爭力挽行行取侯封何必守
蠹簡

陳謂老見過云今年六十有九將預為周身之防
余曰君定未死不如覓錢沽酒耳用戲成拙句贈

行

荷鍾自隨劉伯倫裸葬舊聞楊王孫偉哉二子真曠達
身雖殞滅名獨存要知形骸本外物中有妙用超六根
火風地水歸四大夢幻泡影何足論君不見桓魋石柳
秦鐵戶歌鐘未徹野火焚不如得錢即沽酒時時醉倒
三家村

和徐徑坂韻二首

玉柯仙管頻念我大書束鱣濃墨斑寄情縹渺江海際
匠語慘澹雲烟間燃藜太乙中夜照垂釣客星清晝閒
觀公舒卷皆以道仁智山靜水潺湲

學者山斗吾徑坂杜門養志衣萊斑孤峯度越青雲上
一世失得浮埃間鳳鳴思誠頻遺訊龍卧草廬相對閒
三賢鼎立名師友衡江萬古身潺湲

贈武應辰見徐徑坂

衡陽布衣武應辰柯山迎拜新使君使君道德今天人
不知肯開衡山雲君看衡雲開未開吾道所關非小哉
應辰為我三致意行藏已定顏心齋

示趙與櫛

今年至日有喜色四方士友來請益德場宗英質大學
上饒諸賢問太極草廬一紙墮寄音徑坂七言大書帛
衰予甘遁西河上點檢身心有方冊

壽史刑使

美公博學今揚雄未許蜀珍專瑞蜀喜公奉使今鮮于
又見福星來照福我初敬公因譙疏萬言批鱗折五鹿
我轉敬公緣清操高吟放鶴孤山麓今茲仗斧更仁厚
庭草不鋤生意足憂時兩鬢白髮增愛賢一念緇衣薦
衰予歸卧西河上都騎時來尋澗谷清言竟日無盡藏
想見胷中幾天祿若人盍置論思地垂弧定有鋒車趣
去年五言稱公壽今年笑指湖山綠

贈璘上人

潛齋山雨過從久每說二公不離口山雨去佐玉樓仙潛齋起領金壇守一江一浙兩知音栢枝東指還西否胡然拄杖轉落南膜拜叢中獅子吼

騷體

與張草廬子欲嗣奏聘君草廬寄聲止予歌以答之

姑蔑之墟郡郭之隅幽閒兮陋巷卑溚兮絕樞真人兮
匱藏道貌兮山臞有時兮過市徐行兮當車天津游兮

聞鵲而慨嘆鹿門登兮采藥而躊躇明月兮嘯咏白雲兮
卷舒我評其人陶邵之徒疇昔歲兮司銀臺力抗疏兮
徵玉廬朝奏墨兮欲下暮出畫兮尼諸君一笑兮草芥
余三惜兮璠璣擬箋天兮嗣請近因風兮止余仰高致兮
慕予積卑忱兮願攄善不進兮不已終當諒乎純愚

答徐直方問無極歌

謂無極不可狀兮造化之樞謂無極可狀兮聲臭俱無
至哉濂翁兮是初是圖後來諸老兮交辨鵝湖彼是此

非兮畦畛何殊究其指歸兮風乎舞雩吾默會於心兮
徵以通書陰陽動靜兮何始何初人人有是兮奚問乎
呂陸張朱

遺徐端友壽母夫人歌

望東雲兮懷玉產二英兮鸞鷟持榮名兮壽親頌大
椿兮對菊殮初英兮慕屈子之菲菲飲寒潭兮陋胡
廣之碌碌我敬愛之勉以猗綠垂芳兮無窮介母兮
多福

五言律詩

趣饒伯興來期

忽得高賢訊，篝燈讀數回。
苦辭白鹿講，盍為紫陽來。
水毀祠無恙，堂新教有開。
須君速戾止，倡道淑英材。

寄李頤老

清苦推洪毅，人今合古求。
道東吾所敬，學北子為優。
夜氣存無餒，晨餐缺不憂。
時來同析理，相對一茶甌。

送伯和姪歸里之戍

留爾紉秋桂歸歟迫戌瓜定將儒術飾肯以惠文誇獄
敬裨王國帷褰佐使家公餘更努力學似海無涯

送游幾叟衡山尉

西風催仕輒比部得英曹澤物官無小觀山嶽最高須
知戴星出慎勿厭塵勞綵捧有餘暇何妨誦楚騷

餞用晦姪南安令

爾官神臯日播紳無間言勇懷南邑綬為便北堂萱侍
講鸞棲舊端明棠蔭存時能挹前輩為政有根源

作邑無他法精神在拊摩吏肥民必瘦酒少飯宜多寧
拙催科考須知于為歌莫將還債看好事易蹉跎

挽竹湖李端明

千古筠溪節名孫尚有諸敢言禁闥黯勇退漢廷疏掃
軌門如水懸魚飯只蔬訃傳纓紱駭惜綰不中書

淡似香山老臞於涑水翁政須將及子心孰不為公後
進師清儉前旒譽直空墓陵手所築過者式高風

挽盛君時

忽報斯人訃傷哉命壓頭皇皇如有索落落竟何求學
道魚千里辭家貉一丘幸哉猶有子可解二親憂

欽定四庫全書

庸齋集卷二

宋 趙汝騰 撰

七言律詩

登北苑焙呈高計使謝庾使

急雨收聲霽景開
蓬仙嶺客島雲來
千叢擷秀牙鋪雪
萬臼研膏杵震雷
池上落英留綠葉
眼中飛絮點蒼苔
去年醉墨今重看
笑領詩翁漱滌盃

蜀浙當年貢亦勞
至今惟重建溪毛
地靈丹鳳啣萱草

水聖蒼蚪幻雪濤笑指茶星誇小范愁傷民力歎袁高

顧渚茶詩
高筆也

皇華早晚歸經幄丁俑應難諫舌逃

陪饒計使至北苑焙

東風未綠無邊草北苑先抽絕品芽六轡行山清霧凜
一槍八焙帶烟霞鳳呈奇羽名仙麓龍護香泉供帝家
萬碾玉塵飛動處鬼猶勞矣況人耶

和饒計使北苑焙觀貢品

使華金掌冠卿材曾侍紅雲一朵來龍井為君增洗濯

鳳山來客小低徊膏翻玉雪團香帖味薦金蘭共酒盃
計相他時踵龐老席前數奏記東臺

再用韻

天生神醴地生材曾感當年鸞鶴來釣水取清芳酷烈
採山可茹味徘徊能招霞侶雲中笑得奉龍顏食後盃
細品第三綱最勝人間雙井當興臺

再用韻答饒計使

周原膴膴隸臺綱茶篚馳供玉食香貢重鄭男難並列

品珍考叔未曾嘗乳花烹就分清貺英草吟成屬大方

後蔡前丁同入諷令人懷古九迴腸

東坡詩荔枝嘆武夷溪邊粟粒芽前

丁後蔡相龍加

三用韻答饒計使

郡凋亦辦七茶綱不似霜臺雀舌香上美為元包錫貢
殘膏分丐雪翻嘗三為大有天王饗二得坤中臣道方
退食自公味公賜狂吟牽動璟心腸

謝高茶使遣餉頭綱貢餘

東風吹折鳳山芽
驛獻花箱仗使家
遙想仙芳供御盃
應憐味諫落天涯
厥包錫貢何年始
其苦如飴信地嘉
齋祭無繇陪褥位
膏餘分勺咀菁華

再用韻答高茶使

凡卉千山未吐芽
天生靈草瑞天家
漕修貢事東西解
使起英流南北涯
諫苦固應疏汲黯
品高終必相王嘉
老衰不辦茶歌獻
但誦周原遠有華

謝饒計使遣餉頭貢餘

仙芽龍水辨頭綱百草山中不敢香表進得陪華使拜
貢餘遣餉守臣嘗擬思苦口陳忠諫可但飴茶獻上方
分我清風生兩腋惜無文字只枯腸

慶高耻堂柱史都運

招麾不可獨斯人中外稱為社稷臣永叔未容居四諫
鮮于且起福全閩光華濡轡今親遣風采埋輪又一新
命下八州俱鼓舞紫霞老守喜津津

答高耻堂計使招賞海棠

皇華相約醉宗臺正月海棠彌望開萬象呈春盃潑灩
千花炫夜燭縈迴雨餘妃帶華清沐雲幕仙從絳闕來
明歲公歸對紅藥吟成寄我館蓬萊

再答

西州名品萃東臺特為光風連夜開春事三分元未半
詩腸一日九周迴雨中有淚坡吟盡馬上露花甫醉來
郡塢數株寥落甚園丁愛護剪荒萊

再答

人間姚魏總輿臺，獨占神仙上品開。
絕代詞華三峽倒，當時諫草九天迴。
晚晴大白簷前舉，春煖小車花下來。
筆補浣花溪畔老吟工，壓倒北山萊。

再答

孤風獨上子陵臺，藻思天然頃刻開。
銀燭不妨花下照，鐵心肯向賦中迴。
休懷濯錦江邊夢，早應築沙堤上來。
急裏紫霞望公至也，教凡卉識仙萊。

答高計使韻

使承帝命若予工
膺膺周原布惠風
正似公權懷筆諫
豈如後蔡譜茶功
春盈夏涸疑神水
茶苦飴甘屬太空
芹獻固知仍舊比
采繁洞酌亦昭忠

再用韻賀計使高
耻堂建臺得雨

皇華都騎訪陳人
似洒仙瓢助守臣
亭午建臺申大雨
作霖用汝澤先闢
物情是處皆忻吐
吏習從今一洗新
陝事早知付韓范
堯夫定不歎天津

和高計使郊行

春光物色伴揚班
畫出城南暮入閨
轉蕙風吹禊亭竹
採桑日照女筐繁
清游得共皇華醉
妙語能追紅藥翻
一任鶉鳴芳自若
坐間嘉客意同原

再用韻答謝石嶼庾使

一翁閒伴兩星臺
亭畔看花花半開
我盍歸田垂釣隱
公行持橐侍鸞迴
沅鶯似避宮粧靚
黃鵠曾將蜀種來
二妙賡酬康濟手
橫舟句好相推菜

慶高耻堂柱史除漕

九曲山川值異人，仙靈忻舞對波臣。
德星臨照來從蜀，瘴霧澄清一洗閩。
澤物濂翁仁望著，寬民王旦政條新。
爛柯精舍班荆語，好約秋風到北津。

徑坂許到武夷

紀游一首呈高計使謝庾使

天風吹我到丹青，不覺春華又再經。
芝叟採來雲冉冉，茶仙嘗後水泠泠。
溪山信美瑯琊景，宇宙無窮峴首亭。
登者固多公不朽，老衰得附鳳凰翎。

復用韻答高計使謝庾使

何人漱石枕寒青飛鳥徘徊不敢經却騎同登觀溟滓
懷仙遙想戒真冷西山南浦臨流閣北樹東雲把酒亭
道極高明須峻絕鐵獅峯頂振風翎

陪高計使柱史謝庾使刑郎登梅仙山丹青閣
侵雲祠宇絕荒涼目眴憑虛興寄長仙者遠遊非穆穆
天之視下亦蒼蒼貴公業赴塵泥腐小尉名爭日月光
此地何緣子真到孤忠處處慕留芳

又

節迎吹帽約郊行
衣袂登危露未零
一笑向時分皂白
相逢今日共丹青
清姿照世郎官宿
勁操擎天柱史星
自有此山無此客
來同老守醉還醒

又和饒計使丹青閣韻

久聞傑閣願今酬
亭午登臨到上頭
二水清澄新雨霽
衆峯蒼峭凍雲留
擬賡場圃詩人句
休負煙波墨客愁
信使偕行原隰耀
仙山多謝約同遊

又再用韻和

後期採菊約新酬笑指西風帽戀頭陸羽久仙泉水在
紫芝何代寺峰留霞邊野霧供吟嘯澤畔歸鴻免歎愁
愧乏登高能賦手陪公後乘寫清遊

徑坂左司使君惠和近詩為親而喜合天理之
公得性情之正復用韻以慶

扶杖來觀徧老農清朝新禮采芝翁德尊韋布封員外
恩重牙緋視治中言悟千秋逢主聖躬行萬石耀臣工
求與抑與從天下徑坂丹忱殿陸通

何曾學圃學為農陋巷蕭然白髮翁便拜馮唐長郎署
更榮弘景相山中詔褒忠孝垂青史上想儀型遣畫工
莊叟湛然元不動平生風雨視窮通

奏徑坂尊公致政盛德於上就以詩報之

拜疏歸田學老農天高未肯聽衰翁逸民且舉邵康節
有子併稱程大中給札說書皆御墨教忠錫爵勵羣工
老臣只代臣願請願不祈恩何自通

贊徑坂使君柯山仲春講席之盛

贏糧多士二千餘爭向柯山講席隅立天地心鳴道鐸
開生靈眼識師儒孔融魯國奇男子孟氏鄉人大丈夫
我在紫霞洲上笑惜無羽翼到三衢

驛至得徑坂講席帛詩喜甚和韻且堅秋風武
夷之約

驛足歸來以口陳爛柯山色碧嶙峋橫經二月二十一
聽講三千三百人聖者子孫皆在列愚而夫婦也知津
哀翁首看法筵義文與正蒙相比倫

紫霞老子望青霞喜誦新吟倚鬢華已遣鳴騶迎道左
那知紉佩尚天涯為莊椿壽稱觴近訪武夷仙卜日賒
秋夜月明遊九曲擢歌聲裏賦巖花

和徐徑坂帛詩韻併約徐立大同賦

謁想仙姿詩見之壇高屈宋隸吾麾在邦無怨仁何怨
與世多違道不違一魯丈夫獨儒服百曹相國漫戎衣
折衝人物山中隱誰佐君王立德威

夢徐徑坂

誰云姑蔑遠無諸夢繞柯僊抱膝廬我得間中緇魯語
公應靜裏玩羲圖雷猶地伏陽新復雲向天升雨可需
好倡諸賢為時出只容衰嬾老西湖

用前韻呈史繡使

吁嗟膚使襟期厚來顧陳人老鬚班席地樽開樵舍畔
停雲興在玉柯間不知天上皇華貴也共山中半日間好
向金門領名勝獨留一叟弄潺湲

和史繡使瑞梅韻

憶昔朝旌別未央
逋仙風味飽齊嘗
繡衣來酌東濤月
清節更飡南雪香
姑射真仙陪直指
綠華再萼瑞高堂
蓬萊花使傳春信
早晚芝書趣覲王

餞史計使

祥刑生意徧庭蕢
蔽芾棠陰手自我
世降此翁猶尚德
俗衰時輩但論材
九仙截轡于公去
萬石熏爐召父來
攬轡紫陽垂教地
饒何盍聘到崇臺

饒魯何基二士善為文公之學者也

使者星明太史占
東風戒路揭帷簷
食當加倍稀親酒

獻不求餘少權鹽因進御茶供味諫肯然官燭示家廉
老生莫效臨歧贈詩附仁言當束緼

懷史計使

皇華叱馭遂驅馳抱病忽忽語別離不到天風海濤地
空吟春樹暮雲詩似聞信宿留桑下惜不扁舟趁水涯
一笑論文何日再玉川為我說相思

謝史計使寄建茗

皇華珍意辨頭綱餘馥吾儕也得嘗黯黯終然言有味

全哀那得字搜腸耕雲隴畔知無憾貯月瓢中剩有香
獨念郊民多菜色旱饑粟價踴非常

鎖院既久考文將畢適承按察使房公子靖遣
詩相慰因和以答

恭承禮聘典文宗秉筆秋闈合至公城郭縱遊知有日
院門深鎖寂無風掄才未擬升司馬發策方將問卧龍
忽辱有詩相慰藉一時裁答愧忽忽

附
吳淞人物老儒宗閩浙文章屬鉅公竹葉幾盃惟對

月棘闌數仞不通風較丈已辨珉兼玉揭榜應知魚
化龍近日有心來聽教奈何方面事忽忽

別伯興新鄱陽廣文

特為予來冬復春重尋舊話續新聞諸儒學北今誰嗣
獨步斗南猶有君精舍諸生朝問道郡齋一叟夜論文
繫維不可成分袂搔首江東日暮雲

呈竹湖李端明

淳祐清忠推杜李歸然名德賴公存歲時闕會英耆社

風月稀游獨樂園一榻自觀心主靜諸賢欲扣我忘言
僕歸借屋西湖畔半載才能兩造門

再用韻答

敬簡如翁吾所慕即之目擊道斯存斤歸借卧平泉石
倦出幾名傲吏園早日寒齋令尚友近來徑坂寄傳言
文山歲晚梅如雪擬約龐公到鹿門

次韻叔興見贈

眼界紛紛盡掃除雲烟香霧是匡廬江山信美非吾土

井邑繁雄想舊廬落筆縱橫看草檄感時憂憤欲成

書要須起赴功名會莫守陳編似蠹魚

赴陳元方感黨錮之禍憂憤成

書十篇
號陳子

寄新衡陽徐使君左司山長

醉墨淋漓天地間誰知大德不踰閑世無孔子今希孔
國有顏淵易鑄顏多士龍門一喬岳斯文牛耳兩名山
暮春九曲峯前水一笑風雪氣象還

贈徐國諭

英英直氣驗操存夜校羣書日灌園嬾不到城三十載
老猶落筆數千言吳公何敢輕招賈徐穉茲來特訪蕃
衰拙邇來逢盛事德星遠遠照朱轡饒伯輿自餘干至
國諭自南浦至徐
立大旦夕又自上饒至
又聞徑坂亦欲下顧

贈蕭高士

槃澗老龍埋骨久交游得爾最知心詩摹海嶼天風景
琴弄仙臺玉筍音疇昔羽衣曾過我只今石鼎又聯吟
丹成若欲歸山去恐被人間有物侵

贈隆中黃進士

徧遊天下好山川歸向隆中葺數椽似慕孔明效龍卧
尚隨陶侃指牛眠詩書發冢笑何益富貴乞墦嗟可憐
若語人時勸忠孝福田不似種心田

勉癸丑新進士

霞州守吏慶筵開喜為朝家得俊材九曲山川增氣槩
八元人物照樽罍識佳將報淮沙合文煥新迎御扁來
不朽榮華軒冕外君看雲谷勝雲臺

餞盧威仲

狐腋羊皮孰劣優
每嗟里社尚沉浮
千篇南雪題幾徧
一馬東風去不留
吳地名高詞梅福
漢廷語吉趣朱游
柯山若問衰陳跡
為說猶懷畎畝憂

再用韻答

當年骭髒厄伊優
身寄粉榆宅尚浮
芝鳳未盼羔屢聘
檣烏將發燕難留
朝廷終念孔文舉
里社回思馬少游
煙霧滄波休健羨
吾儕嫠緯莫忘憂

寄六湖陳如晦

琴劍前時為我來，志同道合味悠哉。
每憐一水馬頭險，惜放斯人鷁首回。
魯語手箋應畢卷，汾亭指授想多才。
不知肯踐詩盟否，菊已凋零梅又開。

前詩有秋英之約

寄程滄洲

山間藜杖看初春，忽報滄洲除命新。
今日昌黎司憲部，幾年陸贄任詞臣。
扶持世道宜無策，宗主時賢今有人。
老懶貴遊書盡絕，一詩隄寄雪江濱。

寄盧玉堂武子

建上文忠音響絕爾來復說蔡翁盧君歸南浦顏無怍
我老西河道不孤空有寸心馳記室絕無一字到中都
吟成遣寄嗟何濶開卷應嗤此叟迂

詞李斛峯右司

數士英英未易招當時一網盡于蕭公才何止為陳瓘

朝論今爭推杜喬

見年
中書疏

國定須賢扶宇宙士惟知道

樂簞瓢鳳凰千仞需時下讒說新來已雪消

詞斛峯李純父右司

哀拙新來領建安郡齋夜夢繞餘干東都得爾名節重

西賊聞之心膽寒海內四賢尚家食

執事徐高楊

閩中一叟

愧空餐幔亭仙掌文盟在好與伯輿來共看

詞湖南刑使趙紫薇

繡節當年立碧霄至今遺愛藹權謠雲烟何止能開
霽山嶽曾聞亦動搖縱未振衣華表著不應分席混漁
樵餘干宰士今喬固定有詩筒慰寂寥

登石鼓追思武夷餘干二老呈威仲

雲間把酒更持螯九日登臨意氣豪自有此山題墨富

獨推二老擅名高禪關曾訪移泉脉亭扁重書鎮海濤

老我空遊愧能賦得君藻筆撲名騷

陳北山為余言忠定初書雲嶼文公

睹未愜意更書為天
風海濤今二扁並存

再用韻答

不羨叢菊并二螯羨君出語真俊豪崛竒退之石鼓句

清逸永叔廬山高壯懷傾倒湧泉寺健筆嗟吸滄海濤

後期進步登大頂上續風雅卑莊騷

巖溪書堂登眺

崎嶇穿竹藍輿側高下捫蘿石徑幽虎豹遁時深谷窈
魚龍舞處大江浮公難閒坐山中相我久吟披澤畔裘
白石清泉知此意請將直釣釣璜流

湧泉亭

湧泉亭畔坐蒙茸手指三江撫萬松石鼓生雲深有意
珠驪吐水密無蹤禽聲人語同時樂林影日華相映重

邂逅一樽開笑口菊萸猶笑不從容

挽王國錄

華峯早日得追隨議論詞章頗俊奇
五穀固應羞自斃一夔惜不佐來儀
東嘉把觥論文日婺女停舟問易時
黃壤竟埋斯士骨推賢不早嘆珠遺

挽岩雲趙使君

憶與東岩居里社蘿雲松月共詩盟
傷心遂哭公三世墮淚難招爾九京
領郡抗章生掇禍過庭吟藁死留名

似聞難弟尤儒雅好率諸郎副旦評

挽鄭知府

先正當年遇阜陵在廷玉立指忠清甘棠笏得孫枝紹
使竹符分棣萼榮七袞駸駸登上壽諸郎鼎鼎擅英名
北邙千古知無恨吟些聊供薤露聲

挽朱夫人

蘭陔送母度新阡追憶東岩老謫仙
釐辦咄嗟供婦職肝剖一再續親年
六珈偕老榮何盛二子乘舟晚可憐

彤管責堪陳信史今將列女傳同編

五言絕句

寄李頤老

易說刊成未心傳自法雲

法雲勉齋居也

寄聲揚舶使一力主

斯文

東陳讜送鵝

駢駢何為至於陵轉饋予出哇吾不敢笑付老庖厨

七言絕句

寄仲節金華牧二首

猶記衰翁佩印初曾將四學勸羣儒

理學則程正公史學則司馬文正公

文學則歐陽文忠公經濟學則范文正公

只今郡守西山後好勉人人誦呂

朱

蔡西山乃先君子之師

傳聞議論異柯山辨難何妨莫失懽試取景仁與君實

中和問答幾書看

吾輩論學且當以私書相徃復如司馬文正公與范蜀公是也其後也問

答雖不合而未嘗失相尊敬之心

寄程滄州

身是金華舊使君
聞公新渥倍懽忻
朱轡暫為東萊起
收拾乾淳未墜文

寄高耻堂

江西格了使湖南
又似當年朱晦菴
問學如公真少輩
請將大道講氈談

寄徐左司

立大轉示近製阮嗣宗李白不及也課成二絕以贊

紫洲洲上得詩筒
展誦青霞在眼中
白首漫郎應號叟
黑頭永叔早稱翁

人皆山斗瞻吏部誰敢文章近左司君看玉池金鯉句
盡刊腥腐帶僂姿

贈李喜觀謁徐徑坂

一世龍門未易攀鯁生負笈造柯山東脩以上吾斯誨
應許吟風立雪還

贈林行簡見徐徑坂

紫霞洲上雨如絲白髮良翁有所思吟付三山林敬則
爛柯國手尚觀棋

和韻詞徐徑坂

聖斷鋤姦不大聲傳聞側席遲幽人人今天民之先覺
幡然風俗還振振

次徐徑坂衡陽使君韻示林敬則

千仞岡頭一振衣共嗟鳳德卧郊扉近鋤蕭艾知天意
會見朝陽露欲晞

和徐徑坂衡陽使君韻題漁莊煙雨

列子御風旬五日莊周稱壽八千秋歸歟烟雨濛濛景

夢集班衣賸勸酬

送江墨莊

徑坂仙翁名蓋代得君膠法喜臨池
鷄林鼠島皆知重爾亦聲華萬古垂

寄語玉柯賢太守萬間精舍有詩盟
邇來曾踐斯言否此事須公劇力成

送陳善世

似聞久客滄洲館
昌不相從早數年
老我一丘事耕釣

勞君千里度山川

抱琴幾宿滯秦溪多謝常丞寄近詩細咀絕無烟火氣

其人可與遊漁伊

常丞書來勉以紹洛漁

不須遠遠苦求師恭敬淵源可細推歸路瑞安逢二戴

戴綱戴仔才英而學甚正

為予再四說相思

答鄭宜中

太極成爭今幾年漁翁先得我同然經行醉墨忽忽就

不謂朋儕今競傳

畏暑門稀問字徒袖中妙語契周圖知君十倍侯芭學
老我非雄尚索塗

贈魏安石

魏子本建溪人而寓居瓊山建士多深中而魏子
諒直瓊人喜營利而魏子固窮予以是愛魏子頃
居雙泉與魏子居相隣也日從之遊及予遷儋耳
魏子不遠數百里重趼過予者三今予居益貧無
以資魏子之行魏子垂索而歸笑買松明一擔曰

是可以資夜讀也戲作小詩贈行魏子名安石字介
然云

彈缺歸歟何太速捫腹掀髯飽諸粥囊空裘敝未全貧
賸買松明照幽讀

偶見孟博送仲久詩章輒題二絕代贈

扁舟乘興山陰道春半園林雪未消便解貂裘從我在
小窻幽寂共簞瓢

且看青山覆白雲悠悠世事謾知聞扁舟却絕長江去

回首紅塵路欲分

因遣鄉書贈姜山嗣師

近市依湖十里間
扁舟朝往暮能還
莫教老圃翻鋤盡
留我他年葬骨山

彭松溪薄來承絕句以紫霞翁見號因自號為紫霞翁成二絕走呈徑坂

名齋取義本凡庸
借屋蓬萊理釣篷
特為紫陽訪霞紫
臨流一笑就稱翁

南澗當年浚紫洲

韓尚書

我今取號自虛舟倚欄惆悵青

霞遠何日從君飛珮游

來喻感榮新恩之不暇遂與遊武夷之約

壽致政徐光祿

易躋廿四中書考難聚三千聽講生
入侍親庭為一笑

方瞳弘景轉精神

題永陽文獻錄

姦魂偃月忌吳黃正氣難摧百鍊剛
奇響後來誰接續

玉川拜疏植綱常

冢中夷跼同枯骨身後逢千享令名讀遍永陽文獻錄
可憐齟舌老司成

會饒伯輿徐子薦徐立大三高士一首

英英奇節東州彥凜凜清風南浦豪更有餘干饒有道
建安堂上聚三高

秋詞

雨放涼颿晚復晴小窻人亦共秋清月華網在蛛絲上
錯認踈簾挂水晶

欽定四庫全書

集部
庸齋集卷三
四

詳校官起居注主事臣顧宗泰

主事臣呂雲棟覆勘

謄錄貢生臣吳士英

欽定四庫全書

庸齋集卷三

宋 趙汝騰 撰

表

寶祐改元賀表

必世後仁聿思新治更元發號率由舊章無疆惟休有
截稱慶中賀恭惟皇帝陛下立中居正聰德思恭紹開
寶之宸謨興起百度體嘉祐之聖德扶植衆賢取以表
年監于成憲臣勉膺郡命猶在里居陪宿老以扶藜獲

觀溫詔指輔藩而問戍行布寬恩

皇子進封忠王賀表

大君有命元子進封邦家榮懷海宇慶抃中賀臣聞植
宗藩所以開聖緒加位號所以塞衆心若天禧繇壽春
而昇昇如治平自淮陽而更穎肆在今日率由舊章恭
惟皇帝陛下堯智如神文謨垂後以天下為大器強本
尚親進地圖具禮儀分茅建國頃勝衣既賜履於潛邸
茲重冠爰躋爵於真王星連參井之輝祚等箕翼之壽

臣猥叨保鄣遙睇觚稜誦漢制廟立之詞與父老而同
喜陳賈誼習貫之疏祈左右之皆賢

天基節賀表

太族應於孟春虹流紀瑞神策增于甲子虎拜馳忱無
疆惟休有截稱慶中賀恭惟皇帝陛下聰明時乂問學
日躋總攬權綱法乾旋坤轉之妙舉錯直枉洞陰闔陽
開之機茂迎震夙之辰益衍簡穰之貺臣猥縻漢障遙
想兕觥近天子光知仰瞻於皇極祝聖人壽更申頌以

多男

天基節賀表

太族為生物之津祥開電繞甲子增授帝之筴祝效嵩
呼萬年無疆四方來賀中賀恭惟皇帝陛下聰明時乂
齊聖日躋以清靜治邦家至仁無欲以忠厚待臣庶大
德曰生壽與天而比崇福如川之方至臣身縻符竹目
邇觚稜昔殿中綴班曾預兕觥之列今海濱上表遙伸
虎拜之恭

天基節賀表

頌歷更元杓攜龍角建極居五節紀虹流喜溢乾坤頌
形海寓中賀恭惟皇帝陛下聰明時乂剛健日新德廣
曰生收必世後仁之效業垂可久為詒謀燕翼之思瑞
應河清福如川至臣勉膺符竹尚伏田閭奉漢玉卮遙
想嵩呼之盛上唐金鑑俯伸華祝之忱

天基節賀表

聖與天而比崇應乾九五筴授帝而在甲為春八千社

輯端門頌彤裳宇中賀恭惟皇帝陛下聰明時又剛健
日新好生之德洽民推仁宥罪不殺之武定業以善勝
殘瑞紀星虹壽齊箕翼臣猥縻漢陣阻造周行成天慶
以垂基恭想兇觴之奉揚王休而稽首敬賡虎拜之歌

天基節賀表

帝撫五辰生於甲子天錫萬壽對此春祺一人尊榮四
海慶抃中賀恭惟皇帝陛下齊莊有敬溥博無私化久
而成能盡體常之道澤潤而洽既踰必世之仁節紀虹

流福如川至臣猥叨禁從屬領麾符望魏闕金雀之棲
莫躋舞蹈想漢班玉卮之奉遙寓頌祈

天基節賀表

星渚呈祥先春三日華封伸祝後天萬年無疆惟休有
截稱慶中賀恭惟皇帝陛下聰明時乂緝熙月將以博
施濟衆為心好生不殺以皇受建極為念立賢無方用
迎神筴之增益迓聖圖之遠臣分符輔郡遡目清都聲
效嵩呼阻遙班於北闕光寒斗口遙馳頌於南山

元正賀表

開歲五日光昭華渚之星為春八千增受泰元之筴懽
均有截慶輯無疆中賀恭惟皇帝陛下法式生知淵泉
時出體信達順淳令穡寶之告豐去殺勝殘坐底邊塵
之不聳齊大年於箕翼等盛烈於山河臣猥使周原阻
班漢陛莫遘兕觥之稱壽喻效嵩呼益廣舜德之好生
仰伸華祝

皇太子冠禮賀表

震為主器肇錫真王筮重賓儀始加元服光前令典有
截歡聲中賀臣聞燕翼子所以昭聖謨敬嘉事所以為
國本在昔祥符之盛際嘗有壽春之舊章冠禮舉於戊
寅冊封見於辛卯曠彌文之久隆喜今日之復行恭惟
皇帝陛下從諫轉圜以身為度謂皇子賴天趨拜久矣
勝衣命醴辭令月薦芳俾之受弁元良以正三加彌尊
臣濫任承流阻儕醺酒莫效晏殊之獻賦以遇贊揚願
選馮元之講經俾精教導

明堂慶成賀表

郊之言禋類於上帝廟焉而饗祫于先王禮既熙成神
亦歡洽中賀恭惟皇帝陛下嚴恭自度聖敬日躋蠖濩
儲精肅平居之對越齊莊奉幣舉大報之親祠后皇愉
臨祖考來燕驗豐融之肝饗肇砰隱之休嘉臣濱海分
符望雲拜詔駿奔執豆阻陪多士之恭獸獲若麟遙想
有司之薦

明堂賀表

祀修美報禮極熙成乾坤清寧海寓懽洽中賀恭惟皇
帝陛下嚴恭自度聖敬日躋雅聲遠揚廟焉而親饗令
芳嘉薦郊焉而帝臨既格一純咸來百順臣猥居槃澗
遙睇清壇誦伊嘏之詩莫預奉璋之髦士效祝釐之禱
仰祈錫福于庶民

明堂禮成賀表

嚴父莫大於配天於昭孝奏惟聖斯為能享帝丕顯休
成兩間薦辛四海稱慶中賀恭惟皇帝陛下寅畏自度

祇敬不違先甲齋居八神警蹕季秋美報百物迪嘗欽
柴之禮既竣蓼蕭之澤斯溥臣猥司保障遥睎觚稜歌
清廟相祀之詩阻陪奔走賡明堂孔陽之頌仰贊緝熙

聖製忠邪辨謝表

知人則哲惟帝其難聽予作猷曰王不愆凜若春秋之
筆粲然星斗之芒中謝竊惟為臣之義不同事君之忠
則一諫有直有婉而要歸於責難陳善仕或去或隱而
必揆以立懦廉頑堪猛望之均於徇公滂膺徐穉皆為

合道必因其跡以遡其心恭惟皇帝陛下修己任賢尊
帝籲俊舉伊尹不仁者遠上智如湯去驩兜何畏孔壬
大功同舜崇獎蹇蹇匪躬之節作成諤諤犯顏之風自
端平甲午更化而浚其原迨淳祐乙巳改紀而振其響
凡縉紳錙銖之善皆天地覆載而成公議流通士氣昌
盛近者間隣於激訐乃致小厭其紛紜聖謨洋洋雲章
炳炳刻琬琰以示下期防範而歸中煥乎龍驤鳳翥之
文赫然魚躍鳶飛之造臣祇拜教令敬佩韋弦因思人

主一心攻者甚衆臣下萬態辨之實艱惡紫亂朱固當
審售偽假真之病因噎廢食或恐貽以精失士之憂蓋
國將興必樂骨鯁之猷而人欲病先厭魚肉之味是以
武帝踞視衛青之貴見汲黯則必冠太宗面折士及之
諛指魏徵而為鑑洎我聖朝之家憲尤重天下之人言
乾德開基則取已壞地之疏而復行太平興國則擢能
獻策之士於高等真皇對劉沆而追思田錫仁祖劣遽
瑗而甚優史魚神廟敬光之為人至容其詆新法孝宗

重熹之好學不惡其數辭官此宸意之所素明宜愚忠之以愛助后從諫而則聖以康于民臣有言而逆心必求諸道左右曰可而加察眎聽以衆而為公用臨照於百官斯迪知於九德輒陳梗槩以佐緝熙

賜御書蘭亭詩序謝表

臣某言伏蒙聖慈以御書蘭亭詩序墨本手卷一軸賜臣者伏以永和墨帖紀勝事於蘭亭淳祐奎書煥成文於寶殿飛從天際流布人間中謝恭惟皇帝陛下將聖

多能娛神妙畫筆勢迫羲之之逸飄若游雲序文取孫綽之精光於南澗摹成一札賚及羣工臣緹襲不諉糜捐莫報茂林修禊喻想許李之諸賢暮春浴沂請誦泗洙之大道

賜御製訓廉謹刑謝表

聖有明謨深懲叨憤王不匿指昭示訓彛凡屬見聞皆知警勸中謝恭惟皇帝陛下作新治道戒飭臣工念下民之無辜困於貪墨惡大吏之棄法恣於凶殘肆筆二

銘如綸一札俾永傳於琬琰以誕布於風雷臣祇拜奎
文對揚宸命厲召南素絲之節益勉自公佩康誥赤子
之言必思敬罰

賜御製詩并香茶謝表

臣某言伏蒙聖恩為經筵進講禮記終篇以臣嘗預侍
立特賜御宸翰寶熏龍鳳茶者講親重席篇已竟於曲
臺賞徧細氈勞亦旌於舊史恩華狎至眷施難酬中謝
竊惟戴記之書雖出漢武之世要其奧義不離洙泗之

微言至若宏綱猶有夏商之遺意復興經制全在聖明
伏惟皇帝陛下寤寐斯文緝熙正學十六載討論之久
不替宸思前後儒聚辨之功遂終全帙其大者欲以彌
綸斯世其精者則思追企先猷懋賞親行英髦悉逮以
臣頃在侍立之列乃今亦叨錫賚之榮名馬膳羞照耀
蓬華雲章香茗華飾丘園莫殫報稱之私爰寓贊美之
頌伏願養清明在躬之德收中和育物之功篤信儒行
之言立推經解之教守內則以肅宮掖訂大傳以建本

支杜不仁而純向仁人戒不善而專意善道臣由衷懇切愛助勤拳薰葭蒼蒼益堅用周禮之治淵泉浩浩更祈達天德之施臣無任感天荷聖激切屏營之至

宣賜歷日謝表

聖朝作歷敬授人時侯國頒春對揚帝訓恪恭拜賜兢業承流中謝恭惟皇帝陛下奉三無私建五皇極風雨霜露寓神教於慘舒歲月日時成治功於法象以熙庶績用錫羣工臣敢不無忘憂勤所省耕斂布宣賓餞之

命將以明民奉行寬大之書期於安俗

宣賜歷日謝表

后左右民茂明作歷守股肱郡叨拜成書祇命為榮承
流有覲中謝恭惟皇帝陛下道參化育政本陰陽憲天
聰明泯識知而順則迎日推策嚴出納以授時課自清
臺錫於方國臣敢不對揚休命宣布上恩疊疊治功雖
分陰而亦惜孜孜農事冀有年之是圖

宣賜歷日謝表

大君治歷式重授時小臣觀風獲叨頒朔猥蒙齒命欣
睹聲明中謝恭惟皇帝陛下德合於乾道裁於泰體堯
欽若之意仰察天文采夏小正之書聿成月令爰布宣
於先甲以戒詔於羣工臣遙對龍光動稽靈憲飭部封
之吏夜寐夙興厲原隰之農春耕秋斂

宣賜歷日謝表

元聖當陽萬年盼歷微臣乘障游歲受書翫愒增慚凌
兢拜賜中謝恭惟皇帝陛下道函三極治撫五辰先天

弗違既動與於易準迎日而策又祇命於司存著為成
編誕布方國臣尚茲宣化敬以授時誦夏小正之文劬
農是急奉周始和之令率吏以勤

宮祠謝表

加職予祠聖恩隆甚辭名拜祿臣義當然踏地難勝望
天喻謝中謝伏念臣疎無與比愚不可移頃綴周行不
敢自營於身計每懷宗國所陳粗竭於心思遂積罪尤
至煩吏議荷皇明之洞燭叨大德之曰生於省愆念咎

之中沐浴垢匿瑕之造正班學士錫廩殊庭真軼望於
寵榮蓋莫難於避就思昔周以上卿待管仲仲拜下卿
而還鄭以六邑賜國僑僑惟三邑之受此微臣勉奉祝
釐之職而累牘祈收遽閣之恩蓋進無貪榮而退不方
命是謂得辭受之道其敢昧生成之原茲蓋恭遇皇帝
陛下以禮使臣推仁接下諒臣戇如汲黯在廷犯顏之
時多念臣貧似真卿舉家食粥之日久遂俾無功而祿
不知何德以酬尚勉桑榆之間跬步弗離於學雖在畎

畝之際一飯亦忠於君

授寶章閣學士告謝表

臣忱懇惻控免職名君命頻仍懋承天澤叨恩戰栗揆義忸怩中謝昔者臣光累牘而得允樞副之辭臣熹數疏而亦寢待制之錫是皆道德默有以感召雖出詔令至為之收回如臣么膺與物扞格說大人則藐焉有是心謂明主可為少據其蘊積成愆咎果召簡書賴日月之照臨蒙乾坤之赦宥盡蠲罪垢驟昇光華

以舊綴攝常伯之班特超盼真學士之職淵升之膝君
父極力以扶持谷遷而喬臣子益懷於危懼祇奉釐庭
之秩力避奎閣之榮天九重而蓋高箋五上而莫遂屢
煩睿訓覺淵聽之難回勉拜龍光視前修而有愧何止
小言大祿不勝昔是今非茲蓋伏遇皇帝陛下隆禮尚
賢體仁及下矜愚嘉善不欲以言而罪人售偽冀真惟
恐以精而失士遂令疏遠曲被生成臣永矢弗諼有善
則告兢兢履薄敢云日暮而少休拳拳攄忠不以身遠

而有間

御書建安書院四大字謝表

宸章雲爛肇錫珍題聖敬日躋力扶絕學光躔精舍喜
溢潛藩中謝竊以建安為英哲之邦朱熹續周程之學
於皇翰墨昭揭源流恭惟皇帝陛下居寬行仁據德游
藝是道吾所謂道純一尚儒茲文所以為文雍容肆筆
固聿榮於先覺實加惠於後來臣涓吉奉迎近光舞抃
嘉與多士歌棫樸追琢之詩俾紹前修究淇澳切磋之

業

謝授龍圖閣學士知建寧府表

勉承郡紱祇奉贊書榮渥增輝微蹤知懼中謝伏念臣
初無它技粗有愚忠一言興邦若是其幾何敢默也千
里見王不遇故去豈所願哉進既無補於公朝退合自
娛於槃澗曲蒙睿眷改畀潛藩頃待罪瑣闥嘗為生靈
而請命茲分符竹使敢諉凋瘵而辭行視篆以來撫字
是務然而帑庾赤立事力殫微初至旱魃為災加以蒲

澤多警仰藉皇明之威德旋安田里之歎愁刀劒日銷
雨暘時若惟是環顧諸賢之家食獨容一叟之空餐對
旗旄而不勝汗顏誦絲綸而益深芒背晉峻老龍之秩
加隆半虎之權爛然昭回天為章下飾物凜乎跼蹐朝
受命夕飲冰茲蓋恭遇皇帝陛下臨照百官體貌羣下
守紫雲樓之訓簡注藩侯戒白駒場之詩繫維賢士遂
令衰朽獲拜恩華臣敢不益勉布宣力圖報稱訪民間
之疾苦豈特使寬於一分計宗國之安榮早願旁徠於

衆正

知建寧府謝到任表

自天殊渥易地潛藩頃任以左馮不欲其遠去國今錫
茲名壤特寵之使便家曲為臣謀莫報上德中謝伏念
臣迂無足採愚不可移束髮讀書固已明義利之畛白
首造闕何敢萌福禍之心况明主可為忠言必更化乃
克善治且職居於封駁遂力辨於忠邪詎謂方當官而
行已坐不得言而去積諛諛之擠陷賴仁聖之扶持諭

留行至再三趣領鎮凡數四繼上引嫌之牘旋叨改命
之除惟外太祖正獻臣浚卿與先大父吏部臣不敵皆
於乾道出守建安貌是孫枝續茲棠蔭力循墻而控免
蒙頒詔已弗俞獎其有汲黯之風諭其以朱熹為法適
洪水懷襄之後豈臣子所敢固辭當諸賢隱遁之時在
屬籍不應堅卧勉為吾君而一出既以上意而具宣惟
是牧牛羊者當為之求芻集鴻鴈者必使之安宅察臣
區畫以次條陳茲蓋伏遇皇帝陛下寤寐黎元宵旰治

道謂臣赤心殉國不自榮身容臣純意為民頗知竭力
閔此方之凋瘵付綿質以撫摩臣敢不恭佩訓詞聿嚴
條教心求之若保赤子斷不負聖經之言天生斯而覺
後知亦思振儒先之學

授兼侍讀告謝表

臣某言伏奉告命授臣兼侍讀者臣邱園之迹重侍鈞
天畎畝之忠獲披廣廈叨恩稠疊拜命凌兢中謝思昔
儒紳再為侍讀其在元祐之際獨有蘇軾之除孰謂非

才乃膺是選伏念臣粗知忠鯁見謂迂愚頃年折五鹿
之奸旋遭言去元日覩羣龍之用獲預彙征擔簦未近
於神畿除目已盼於經幄日月不棄螢爝滄溟下取涓
流而臣久從諸生瓠葉之盟乃復得綴更化金華之講
蓬鴛鸞而忻幸覺麋鹿之忝營茲益恭遇皇帝陛下從
諫如流見善若決天資神聖羣策莫望於清光學力緝
熙多聞更加於遜志亦令衰朽俾竟講廟臣敢不益浚
新知上承顧問是道即周孔之道誦昔所聞吾君為堯

舜之君乃臣所願臣無任感天荷聖激切屏營之至

侍讀謝告表

進講無功侍言有命莫回淵聽勉拜訓辭中謝竊惟邇
英最重勸讀凡朝紳皆榮此選雖宰執亦居是官厥今
李韶以舊翰林游侶以前揆路一則岷峨之老而問學
之正一則閩嶠之擢而識見之高然而韶則累召而卧
家侶已踰年而歸第曾謂異數猥及愚臣伏念臣蹇淺
妄庸迂疎退惰初無講貫豈能窺河南龍門二程之緒

餘何有開陳每深愧太未建安兩徐之風骨年餘殿幄
日覲宸光雖粗通於上世雅誥奧義之文豈盡析於大
學聖經賢傳之旨是以前奏犯顏以儒林四臣致請後
牘忘分以考亭諸生為言溫詔曲盼俞音竟闕屬預駭
犇之列難遂牢辭之惊出使者於大門是則不敢綴明
師於廣厦益重懷慚茲蓋恭遇皇帝陛下以虛受人謹
微接下知臣不忘少時受詩之習俾在細旃念臣久立
正座自講之隅又加重席臣敢不益溫舊業仰荅殊恩

王庶幾改之亦欲少行於臣學政不足間也所期上格於君心

知婺州謝到任表

躋之奎閣畀以輔藩君恩至隆臣質奚稱中謝竊惟寶婺密拱清都地望則甚高天聽則孔邇上德意易以下達下疾瘼便於上聞於茲承流庶幾行志臣愚加之拙鈍濟以迂愚嘗使直廬甚乏陸贄韓愈之詞筆繼令出守又愧元結陽城之政聲比叨司臬之除謹體好生之

念然而風裁素乏霜采莫揚擬及考以丐閒誤聽恩而
易鎮踵公卿重臣之選游義理大儒之鄉望不及焉榮
亦甚矣惟是值氷雹之後困矣黎元積綾羅之征殫哉
物力若但以繭絲為職業弗知盡芻牧之勤勞雖能得
民財而不能得其心豈足為聖朝之報欲無負天子而
亦無負所學必兼為邦本之思要於輕重緩急之間而
當抑揚弛張之舉豈應庸懦可課循良茲蓋恭遇皇帝
陛下視民如傷求士若渴謂臣碌碌難強以趨事赴功

之才察臣孜孜或能守節用愛人之訓遂叨選使仍被
趨行臣祇見編氓敬宣美化審先務而為政焉敢專俗
吏之催科有餘力則學文當俾紹先賢之統緒

温州到任謝表

駑伎無堪力辭詞直龍光過厚躡畀輔藩既見吏民且
宣德意中謝伏念臣稟資慙拙觸事迂疎從魯兩生嘗
粗窺於樸學辱漢諸老廼競譽其能言遭逢聖時塵滓
翰苑上有動老癯之實臣筆弱不善發明上有服武夫

之神臣思滯莫能寫狀然且歲靡廩粟日汚班行實踏
地以靡皇數籲天而求去過蒙睿簡更付名麾自王謝
以來已號山水佳麗之郡迨周程而後又為師友淵源
之鄉獨是邇年大異昔者閭閻困瘁幾不聊生庾帑空
虛殆無以立使能吏猶為束手縱賢者未易承流豈伊
孱庸乃俾負荷茲蓋恭遇皇帝陛下推仁養士以禮使
臣念其殫視草之勞粗諳宸慮責以盡求芻之牧必得
民情迨其臨遣之時詳以撫摩之訓臣敢不夙宵竭力

冰蘤持身對揚天光扶赤子之氣脉崇尚風化植前修之緒餘

權吏部侍郎謝告表

擢從柱史攝貳吏銓位寘超躋恩華莫稱中謝竊惟西清之秩實為邇列之聯淳熙大儒如張栻朱熹積盛名不登茲選近世宗老若汝談彥懌亦皓首方居是官曾謂么麼乃叨陵躡伏念臣迂愚而僻踈拙且庸外之無惠養澄清之勞聲績見謂陸陸內之乏文墨論議之譽

建明不過平平已徧歷於兩螭更峻升於一武以闢茸
尾荷橐之後以空虛當藻鏡之司由濁而清易右而左
矧大化調琴之日而衆正征彙之辰固得盡觀天下之
豪英或可助國獨恨略無胷中之尺度何以知人任匪
所堪處尤非據莫遂循牆之避益深負乘之慙茲蓋伏
遇皇帝陛下器使時髦力收名俊付太宰以八柄詔王
之任既不輕於進退之間畀常伯以四曹總判之權又
使詳於綜核之際察臣粗諳武選之事假臣承乏文部

之衡顧乃責以裁量不暇計其譴薄臣莫知報稱惟竭
公忠守道不如守官固安敢以廢法舉善是為舉類亦
時效於掄材

吏部侍郎謝告表

正從掌銓君恩過渥巽函盈篋臣罪當誅既黽勉以祇
榮敢稽遲而叙謝中謝竊惟辭遜者臣子之大節愛護
者帝王之至仁強司馬光入翰林怒其拜而未受之慢
趣呂公著就學士至有徐而勿迫之言此烈祖以厚於

士風而微臣乃遇於今日伏念臣迂愚自信鈍拙無奇
非有建明之寸長久污班列徒抱忠忱之一片上對穹
蒼謂明主可與盡言故在廷數至妄發偶因巧去適會
得遷十數揆義以固辭前後被旨而不允然物議猶責
其當去在臣心欲受以何繇金華之控避勤拳玉音之
勸勉諄篤以至為選吉日以供職再遣大璫而傳言而
臣猶恐犯衆多之譏厥後遂更積遷延之咎若稽前代
當在禦魑魅之科獨賴睿慈每為霽雷霆之怒近因臣

方叔屢以聖語而催督遂同臣尤煇三思君命以彷徨
真無地以自容共牋天而擬拜期以鵬朔仍句叢祠講
次復覲於威顏趣就又厪於宸旨甚孤始願何敢終辭
茲蓋恭遇皇帝陛下聖度海涵皇明日照察臣惴惴但
欲全禮義之維容臣徘徊遂少白羞惡之志敢食大信
恭被明綸朝受命而夕飲永中懷愧報詩考槃而人在
澗早冀生成

權工部尚書謝告表

己酉二月二十七日

權從銓貳攝長起曹位置頓超恩榮莫稱中謝竊惟工
必信度是惟禮義之時投亦咸精足彰綜核之世能諫
苑園宮室則可以裨示樸知備車馬器械則庶乎佐中
興司存雖號於清閒事典實關於理亂使綴常伯必惟
英材伏念臣見謂庸凡自信愚拙僅能守昔人之糟粕
莫悟斲輪徒有憂宗國之忠忱遑思卹緯再歸班列久
汙高華一毫無補於朝家累牘祈聞於里閭忽膺奎筆
叨假冬卿在昔太宗之明以旌大亮之直曾是乏論思

之益乃遽塵喉舌之聒旁觀交指於維鵜自懼殆同於
樂鷄再命而倭三命而俯竟不獲以踰垣昔日受是今
日受非益豈勝其維谷茲蓋恭遇皇帝陛下宰割萬
宇照臨百官謂臣學無愧于工師粗知不負察臣心勿
忘於藝諫庶幾能言乃於新元有此親擢臣敢不俯堅
素履仰答殊恩望山巔水涯之賢不無愧色在厦下旃
上之際益勉忠規

謝進開國伯加食邑表

上盼祭澤丕徧羣工臣進爵封超躋三等鼎來殊渥祇

拜明綸

中謝

伏念臣叨守潛藩奉行寬詔俯想欽哉之

盛莫預駿奔猥該湛露之榮不遺馬走走既七命以就伯
復多邑以增腴豈惟僥踰有茲際遇此蓋恭遇皇帝陛
下以仁覆下歛福錫民謂多士奉璋相成祀事雖爾身
在外亦布邦條爰錫恩徽益隆眷遇于以見聖心之公
普予以示餽惠之周流臣沐浴生成糜捐報稱不稼而
永三百俯愧無功敬天之休萬年仰祈懋德

明堂賜劄謝表

中辛舉祀先甲敷言一劄宣傳四方懽動中謝恭惟皇
帝陛下齊莊有敬視聽思恭事父孝故事天明聿嚴大
報在宮雖則在廟肅預戒我將一哉王心告於臣下臣
神馳極北迹滯周南肇裡迄用有成阻陪熙典無競不
顯惟德遙賦烈文

--	--	--	--	--	--	--	--